

BIJLAGE 4:

1485, 14 april : Schepenbrief, opgesteld op verzoek van Jan en Claes van Heetvelde, erfgenamen van Beatrijs van Muisen.

Universis presentes literas magisterium, scabini et consules opidum Bruxellensis salutem cum noticia veneratis noverunt universi nos sub anno domini millesimoquadringentesimo octuagesimoquinto mensis aprilis die decimaquarta ...

Allen den ghenen die dese letteren selen sien oft horen lesen Imbrecht van Aelst ende Jan Soen wilem Laureys saluyt met kennissen der waerheyt. Alzoe in den testamente oft utersten wille wilen der gebuertigen ende voersieniger vrouwen Beatricen van Muisene, vrouwe in huerrer tyt van corbays ende weduwe wilen saleger gedachten heeren Claes vanden Heetvelde, riddere in synne tyt haeren van corbays voerscreven zij, dwelc de selve vrouwe opten veerthiensten dach der maent van augusto inden jare onsen heeren duysent vierhondert ende drientachtig lestgeleden gemaect heeft voere heeren Andriese vanden Wyenhove, priestere, openbaer notaris ende zekere getuygen daer over geroepen, onder vele andere clausulen ende articulen aldus luydende van woerde tot woerde :

Item es den wille ende begheerte der voerscreven testateuressen dat nae haer doot tot ewigen dagen gedaen sullen worden drie missen de weeke op huere hof ter Linth inde capelle aldaer, staende inde prochie van Grymbergen, ende die missen doterende gheeft zy ende laet midts deserer hueren testamenste oft utersten wille tot behoef der selver missen vyfthien Rinssche gulden erffelyke rente, elken gulden te vyf scellinge groote Brabants gerekent, die zij bewijst ende besedt oick midts desen op huere huys ende hoffstad met allen synen toebehoerten, gelegen binnen Bruessel in de Corte Ridderstrate, gelijc ende alsoe zij tselve huijs op desen dach besittende es ende sullen dese missen wanneer zij vaceren sullen gegeven ende geconferereet worden byden ghenen die tvoerscreven huere hof te dien tyde besitten sal. Item selen noch de voerscreven Jan ende Claes, der voerscreven wilen her Claes kinderen ende huere oort ende nacomelingen moeten betalen uter voerscreven herberghen jaerlix ende erffelic de vijfthiene Rinssche gulden erffelic, die zy, soet boven vercleert steet, gemaect heeft totter fundacien van drie missen de weeke, op huere hof te Linth gedaen te worden, maer in verlichtingen van desen laste ende in recompensacien van dien, wilt zij ende ordineert dat de voerscreven Jan ende Claes, huere oire ende nacomelingen, die de voerscreven herberge besitten sullen, selen hebben ende heffen die thien Rinssche gulden erffelic verpant ende beset op de herberge, geheeten de Catte, inde Herchstrate gelegen. Soe eest dat om den voerscreven testamente ende utersten wille der voegen wilen vrouwen Beatricen van Muisene genomen te syne ende soe hem toebehoort te veldoene, opten dach van heden voere ons comen zijn, in properen personen Jan ende Claes vanden Heetvelde, gebruederen voerscreven sonen wilen here Claes vanden Heetvelde, riddere, die hy hadde van vrouwen Johanne vander Noot, synder wettigen gesellinen was, ende nu zijnder weduwen dewelke vrouwe Johanne de momborie vanden selven hueren kinderen heeft in presentien ende consente ende wille der selver vrouwen Johannen, huerer moeder ende momboressen, ende hebben geloeft te geven jaerlix ende erffelic heere Willemme Goetkint, priestere, cleyn canonick van Sinte Goedele in Bruessel, ontfaende inden naeme ende tot behoeff der voerscreven drie erffelicken weeckmissen, op huere hof te Linth inde capelle aldaer, tot ewigen dagen naden voeweerden, vuegen ende manieren hier voere verhaelt ende gecelebreert te worden. Te wetene alle jare vyfthien Rinssche gulden tstück, te vyf scellinge groote Brabants gereckent, half tsint Jansmesse naestcomende ende half te kersmesse daer naest volgende ende alzoe voertane jaerlix ende erffelic te vergelden ende daer voere hebben de voergenoemde Jan ende Claes vanden Heetvelde by wille ende consente ende vuyt crachte als boeven den voerscreven her Willemme Goetkint tot behoef voerscreven geset ende verbonden teenen zekeren onderpande

een woeninge met hueren gronde ende allen den huysen inden selven grondt staende soe voere, soe achter, welke woeninghe gemeynlic te heeten plach den Gulden Aer ende metter poerten uuitgaende van desen goeden inde Grijpstrate ende metter hofstad ende huysen daer opstaende, geheeten gemeynlic de Scole, totten voergenoemde goeden behoerende ende allen hueren anderen toebehoerten ende aenhanghinghen der voerscreven goeden, gelijc de vorgenoemde her Claes vanden Heetvelde ende vrouwe Beatrijs van Musene, syne wettige geselline, de voerscreven in hueren tyt selve te bewoenen plagen ende gelegen zyn voere inde Corte Ridderstrate, tusschen de woeninge geheeten tGulden Scaep in deen zide ende de goeden toehoerende der woeninghen, geheeten den Ketel, in dandere, ende achter in de Grypstrate tusschen de goeden wilen Godevaerts van Helmont in deen zyde ende de goede wilen her Jans diemen heet Myelys, priestere, in dandere, hem aldaer genouch bewyst voere eygen behoudelic eenen tornoy's goet ende gene die vuyt eenen deele van den muere vanden coesrenen, staende aende voerschreven groote woeninge, sculdich is te gane ende acht cheinsgulden vuyten voerscreven huysen, geheeten de Scole, met hueren toebehoerten jaerlix ende erffelic gaende ende te betalen, ende tanderen tijden vercocht ende bewesen. Item de voergenoemde Jan ende Claes vanden Heetvelde, by consente ende wille als voere, hebben den voerscreven her Willemme Goetkint tot beoef voerscreven hier voere noch geset ende verbonden teenen zekeren onderpande een hofstad metten huysen daer op staende, gelegen in een cleyne streetken neven den Puttenberve staende achter aende goede, geheeten den Cloot, tusschen de goede voerscreven in deen zide ende de goede wilen Jans vanden Arcken, die daer na waren Willems, geheeten de meyer, Heekeleers in dandere, metten gebruycken vanden selven streetken hem aldaer genouch bewijst opten cheins die daer sculdich es vuyt te gane. Geloven hem tot behoef voerscreven daer af waerscap. Dits geschiet by consente Gheerts vanden Winckele van wegen der ierste capelrien des outaers van Ons Lieven Vrouwen inder capellen van Sinte Katelinen, by consente desselvs Gheerts vanden Winckele van wegen der tweester capelrien desselvs outaers ende van wegen der capelrien des outaers van Sinte Pauwels inder kercken van Sinte Goedelen in Brussel gefundeert als vrouwen vanden gronde daer overstaende. Behoudelic der selver vrouwen vanden gronde rechte altoes in allen dingen met voerweerden hier inne ondersproken, dat de voergenoemde gebruederen vanden Heetvelde oft huere oire, erfgenaemen ende nacomelingen besitten des voerscreven goeden alst hen namaels gelieven sal quiten ende aflossen selven moegen de voergenoemde vyfthien Rins gulden erffelic eens ende teenemaele, ende elken Rinssche gulden erffelic daer af, om ende mids achtiene gelijke Rinssche gulden, inder weerden voerscreven, eens daer voere te geven ende metten cheinse vanden termijne, dien naden dach vanden voerscreven afquitingen al ernaest vallen ende verschijnen sal, ende daermede hen ende huere voerscreven goede van dien cheinse alzo gequijt zijnde lossen ende vrijen behoudelic ende hier inne versien dat, inne gevalle den selven voergenoemde erfcheins van vyfthien Rinssche gulden hier na maels gelost ende afgequeten worde, dat alsdan de penninge daer af comen selen vande voerscreven godeliker dienste van deser stad ende daer bliven totter tyt toe die wederom aengeleet ende bekeert sele zyn in geliken erfcheins, ter natueren ende tot behoef vande voerste godeliken dienste int jaer onssen here duysent vierhondert ende vierentachtentig achtentwintichsten dach der maent van meerte. Sic signat ...

ARB., Kerkelijk archief van Brabant, 8285 : Norbertijnerabdij te Grimbergen, kapel van Lint, schepenbrief, (14 april 1485).